

UPUTILA DEMANTI



Hairlahović odgovorila RS BiH: Izvještaj o svim aktivnostima dostavljen je u protokol

Klix.ba
jučer

14 5



Lejla Hairlahović

Bivša generalna sekretarka Rukometnog saveza Bosne i Hercegovine Lejla Hairlahović uputila je demanti na saopćenje koje je RS BiH dostavio medijima.

Hairlahović je istakla kako demanti objavljuje pod punom moralnom, krivičnom i materijalnom odgovornošću, a pomenula je činjenično stanje da sadašnji Upravni odbor još nije priznalo Ministarstvo pravde BiH.

"Utakmica sa Češkom je prijavljena u julu jer je rok bio 23. juli, odnosno, tri mjeseca prije početka takmičenja. Svaka nacionalna federacija prijavljuje svoje termine i RSBiH nije imao nikakav utjecaj na kolege iz Bjelorusije. Postupak mijenjanja termina je propisao EHF. Gerflor podloga za koju sam lično potpisala sporazum trebala je biti uvezena nakon Evropskog prvenstva u Varaždinu. Do posljednjeg trenutka smo bili u kontaktu, a ona nije uvezena jer potpisnik ugovora, Rukometni savez BiH, u tom trenutku nije imao, a ni sada nema, ID broj. Svi oni koji poznaju procedure u vezi s uvozom robe znaju da se ona ne može uvesti ako pravni subjekt nema ID broj, a ni račun sa kojeg će platiti troškove uvoza i carine. U tom trenutku Savez je bio i deložiran. EHF je odlučio da podlogu donira narednoj državi s liste čekanja", navela je u saopćenju.

Bivša sekretarka je potvrdila da su detaljni izvještaji o svim aktivnostima koje su provedene te onima koje su započete, ali ne i završene, predati u protokol saveza.

"Moj izvještaj je imao blizu 20 stranica, a tamo je detaljno opisan problem sa sponzorima i opremom. Naglašeno je da je ugovor s dobavljačem u kojima je igrala reprezentacija raskinut, a započeti su pregovori sa bh. kompanijom. Kada su u pitanju ugovori sa sponzorima, isti nisu mogli biti potpisani s RS BiH jer RS BiH nema ID broj. Lično sam odradila dolazne i odlazne certifikate i na računu u EHF je prikupljeno oko 15.000 eura do septembra 2018. godine. Na raspolaganju sam bila Almi Čengić, tehničko lice u Savezu, i nakon moje ostavke, odnosno, odlaska u augustu 2018. godine, a vezano za sve upite koje je imala prema meni. Na raspolaganju sam bila svima iz RS BiH koji su imali upite prema meni. Na kraju, ljude koji sada vode Savez pozivam da se bolje informišu prije nego u javnost izađu sa svojim stavovima. Želim im da što prije završe proces registracije, kako pravne, tako i porezne, te da povedu RS BiH na put kojim treba da ide. Kako nisam uključena u rukometni sport u BiH niti na bilo koji način, iskreno se nadam da je ovo posljednje obraćanje i posljednji demant u vezi sa stanjem u RSBIH. Kada bude vrijeme za to, mnoge stvari i uloge će biti otkrivene", poručila je Hairlahović.

Podsjetimo, RS BiH je ranije izdao saopćenje u kojem je [pojasnio sve probleme na koje je naišao novi UO te detalje o organizaciji mečeva protiv Bjelorusije i Češke](#).

Rukometni savez BiH

Lejla Hairlahović

ABC▼ Prijavi grešku